

瘍醫大全目錄

卷二十六

脚氣部

男婦緩風脚氣門主論

附方

新增江蘇揚州府江甘儀三邑婦女脚氣門主

論



瘍醫大全卷二十六

燕湖顧世澄練江氏纂輯

培錢之栢東陽

男

槐燮用和

全校

脚氣部

自男婦緩風脚氣起至揚州江廿儀婦女脚氣治各
不同法則俱彙於此部中以便檢閱參治



男婦緩風脚氣門主論

太陰陽明論曰陽受風氣陰受濕氣。傷於風者上先受之傷於濕者下先受之。○清濕襲虛則病起於下風雨襲虛則病起於上。

邪氣臟腑病形篇曰身半已上者邪中之也身半已下者濕中之也。

陰陽應象大論曰地之濕氣感則害人皮肉筋脉通評虛實論曰蹠跛寒風濕之病也。

臟氣法時論曰脾苦濕急食苦以燥之禁濕地濡云



調經論曰寒濕之中人也皮膚不收肌肉堅緊營血
泣衛氣去故曰虛虛者聳辟氣不足按之則氣至
以溫之故快然而不痛

五常政大論曰太陰司天濕氣下臨

六元正紀大論曰太陽司天之政民病寒濕發肌
萎足萎不收○太陰司天之政民病寒濕腹滿身
腫憤肘腫○太陰所致爲重肘腫

生氣通天論曰因於氣爲腫四維相代陽氣乃竭
經脈篇曰胃病則大腹水腫膝膕腫痛○足陽明實



則狂顛虛則足不收脛枯

平人氣象論曰足脛腫曰水

張景岳曰脚氣之說古所無也自晉蘇敬始有此名

然其腫痛麻頑卽經之所謂痺也其縱緩不收卽

經之所謂痿也其甚而上衝卽經之所謂厥逆也

逮夫後世則有類傷寒四證而以脚氣居其一謂

凡頭痛發熱身痛便閉而但見脚膝屈弱無力者

便是脚氣此說太混予不然之夫脚氣本水濕下

壅之病而實非陽邪外感證也若諸證之兼見者

則若有之若以外感之脚軟者便認作脚氣則淆亂意見大不通也

又曰脚氣之證其初甚微飲食動作無不如故或無他疾而急得之或因病後而漸得之及其病也則自膝至足或見麻痺或見冷痛或見痿弱或見攣急或腫或不腫或日漸枯細或蒸蒸惡熱或洒洒惡寒或如冰冷或如火熱或到底能食或不能食或有物如指發自臑腓而氣上衝心是皆脚氣之正病也其有爲發熱頭痛寒熱往來或腹內作痛

或見飲食則嘔吐或惡聞食氣或不欲見明或語
言錯亂精神昏憤是皆脚氣之兼證也大抵此證
有緩急緩者其來漸或二三月而口甚其來速或
一二日而卽起治之若緩恐其氣上衝心亦能殺
人

又曰脚氣之因有二一則自外而感一則自內而致
也自外而感者以陰寒水濕雨霧之氣或坐卧濕
地致令濕邪襲人皮肉筋脉而凡清濕襲虛則病
始於下致爲腿足之病此外因也自內而致者以

肥甘過度酒醴無節或多食乳酪濕熱等物致令
熱壅下焦走注足脛而日漸腫痛或上連手節者
此內因也然在古人謂南方卑濕病多外因北方
嗜酒酪病多內因此固一說然北方亦有寒濕南
方豈少酒濕此固不必分南北其或內或外凡受
邪氣有病始於足而漸致他證者卽脚氣之謂也
必察其因而治之則自無失矣

又曰方書以腫爲濕脚氣不腫者爲乾脚氣濕者宜
除濕乾者宜行氣

陳無擇曰脚氣不專主一氣亦不專在一經兼有雜
生諸病未易分別須尋經絡之陰陽再察脈息之
虛實以爲治也凡自汗走注者爲風勝無汗攣急
掣痛者爲寒勝腫滿重著爲濕勝煩渴燥熱爲暑
勝若四氣兼中者但察其多者爲勝分其表裏以
施治也

張景岳曰脚氣之病實三氣之所爲也然亦有虛實
之異又脚氣本爲壅疾古云忌用補劑然必下元
不足及陽明之氣有虧者而後邪氣得以犯之此

其中亦有虛證總之凡治此者只因證施治則萬全但察其因於表者以發散爲主因於裏者以清利爲主外因者多寒濕宜用溫熱內因者多濕熱宜用清涼若元氣本虛及病久致虛者必當培補下元不得以忌補之說爲拘也

又曰脚氣初起無非濕滯如無他證兼見而身體重著者單宜治濕以分利爲主○凡脚膝中濕或腰腿痠痛重著腫痛者宜除濕湯不問久近乾濕並可用○若脚膝痠軟重著而胃氣不清或見噫氣



吞酸脹滿者平胃散○若脚氣浮腫而兼泄瀉者
宜五苓散或胃苓湯

又曰寒濕外侵致成脚氣者十居六七其證疼痛拘
攣惡寒清厥脉多弦細治宜以溫經除濕爲主是
以古人治此之法大抵熱藥多寒藥少故每用麻
黃川烏桂附乾姜之屬內經曰濕淫於內治以苦
熱正以烏附麻黃走而不守故能通行經絡乾姜
官桂辛甘大熱故能助陽退陰清濕既除病無不
愈○凡感寒濕雨水或四氣流注致成脚氣腫痛



不可忍者宜鷄鳴散如神○若寒濕內侵陽虛陰
盛胃氣不強經氣不行頑本浮腫或疼痛不用者
獨活湯○若寒邪入腹喘急疼痛或筋急主衝閉
亂危急欲絕者茱萸丸或茱萸木瓜湯○若寒濕
在經血脉不和腰脚筋骨痠軟無力或拘攣疼痛
脉弱而瀉者酒浸牛膝丸○若寒濕壅腫氣滯不
行或冷或痛者立效散○若寒濕兼風者如五積
散小續命湯皆宜用

又曰濕熱內蒸致成脚氣者多因酒食不節其證必

煩熱多渴脉見滑數二便或多不利治宜利濕清
火爲主○若濕熱下壅足脛腫痛不消者防已黃
加減治之或蒼朮黃柏丸或二妙散或加味二妙
丸俱妙○若濕熱氣壅上衝胸腹煩渴悶亂煩痛
口乾者活人犀角散○若濕熱流注經絡肢節癢
疼脊背沉重手足偏身疼痛熱腫者當歸拈痛湯
○若感冒暑濕肢節疼痛身熱口渴小便赤澀氣
虛氣促者清暑益氣湯○若肝腎陰虛血熱脚瘡
疼痛行止艱難小水不利者續斷丸

又曰脚氣有壅滯氣逆者其證必喘滿氣急上攻心腹甚至危急可畏治宜行滯降氣爲主○凡脚氣上衝心腹喘急不得眠卧者紫蘇散栝榔湯或加減栝榔湯甚者四磨飲○若脚氣喘急腹滿脚腫者桑白皮散或木通散○若脚氣臍下氣升衝心煩悶者木香散或栝榔散○若脚氣心胸壅悶嘔逆多痰不食者半夏散或紫蘇湯○若浮腫心腹痞悶小水不利大腹皮散

又曰風濕合邪而爲脚氣者其證必兼外感而或爲

寒熱往來或爲喘欬氣急或流走無常或筋骨疼痛治宜以散風除濕通行經絡爲主○若感四時風疫風濕或處陰濕之地致爲脚氣痿弱筋骨疼痛或寒熱往來者敗毒散○若寒熱如瘧赤腫疼痛者加味敗毒散○若脚氣以風寒濕邪客於經絡而骨髓酸痛不可忍或遍身疼痛惡寒嘔逆者五積散一法加全蝎三個入酒煎服○若脚氣以風濕留滯而陰寒外閉表邪不解或欬喘滿寒熱者小青龍湯○若風濕留滯肢節煩疼心神壅

悶者大腹子散○千金云若脚氣脉大而緩宜服
小續命湯二劑立瘥活人云脚氣屬冷者以小續
命湯煎成入生姜自然汁服之最快○若脚氣風
濕勝而兼發熱欬嗽肢體疼痛者芎芷香蘇散○
若脚氣風濕流注憎寒發熱無汗惡寒者麻黃左

經湯

又曰脚氣有虛證凡脾胃肝腎之脉皆出於足邪之
易入多有乘虛故肝虛則筋病腎虛則骨病脾虛
則肌肉病胃虛則宗筋病或以勞慾不節或以酒

濕太過或以病後失調凡內有虧損而外有腳氣者無非虛證此當以調補為主而兼察四氣以治之○若肝腎陰虛感觸四氣而癱瘓頑木半身不隨脚膝無力遍體疼痛者神應養真丹或三因白斤丸或虎骨酒或八味地黃湯○若脾胃大虛陰寒在下陽氣不行而病脚氣者獨活湯附子八味湯○若精血不足陰虛於下氣不歸精而脚氣上逆衝心者地黃湯○若脾胃虛寒兼風濕外邪而成脚氣者用引獨活湯或追毒湯○若脚氣以脾